

CONSELLERÍA DO MEDIO RURAL

Corrección de erros.-Orde do 30 de decembro de 2010 pola que se regula a aplicación dos pagamentos directos á agricultura e á gandaría e das axudas ao desenvolvemento rural para a utilización sustentable das terras agrícolas no ano 2011.

Advertidos erros na Orde do 30 de decembro de 2010 pola que se regula a aplicación dos pagamentos directos á agricultura e á gandaría e das axudas ao desenvolvemento rural para a utilización sustentable das terras agrícolas no ano 2011, publicada no *Diario Oficial de Galicia* nº 6, do 11 de xaneiro de 2011, cómpre facer as seguintes correccións:

1. Na páxina 589, no número 5 da letra n), onde di: «Avicultura: outras aves de curral distintas das poñedoras: 0,003 UGM», debe dicir: «Avicultura: outras aves de curral distintas das poñedoras: 0,03 UGM».

2. Na páxina 610, no número 1 do artigo 87º, onde di: «Os/as solicitantes con axudas aprobadas no marco do CES comunicarán ao Fogga o cumprimento dos compromisos asumidos para o ano natural antes do 31 de marzo do ano seguinte», debe dicir: «Os solicitantes con axudas aprobadas no marco do CES comunicarán ao Fogga o cumprimento dos compromisos asumidos para o ano natural antes do 31 de marzo do ano seguinte, ou no prazo de dous meses a partir da data de recepción do comunicado de aprobación da solicitude inicial da axuda, se este foi recibido despois do 1 de febreiro».

3. Na páxina 615, no número 2 do artigo 106º, onde di: «Non obstante, durante o período de cinco anos de duración dos compromisos derivados da concesión do CES poderá solicitarse unha modificación e/ou ampliación dos que fosen suscritos inicialmente», debe dicir: «Non obstante, durante o período de cinco anos de duración dos compromisos derivados da concesión do CES poderá solicitarse unha modificación sen ampliación dos que fosen suscritos inicialmente».

4. Na páxina 620, na epígrafe b.1 do anexo 1, o texto do número 3 queda redactado como segue: «3. Fotocopia do CIF cando o solicitante teña persoalidade xurídica ou sexa unha persoa física non individual (comunidade de bens, sociedade civil, etc)».

5. Na páxina 620, na epígrafe b.1 do anexo 1, o texto do número 5 queda redactado como segue: «5. Documento de outorgamento de representación no caso de solicitantes con persoalidade xurídica ou de autorización de sinatura cando o solicitante, sendo persoa física, non é quen presenta a solicitude».

6. Na páxina 648, no modelo de impreso DC do anexo 1, o texto do número 2 da epígrafe A queda redactado como segue: «2. Fotocopia do CIF cando o solicitante teña personalidade xurídica ou sexa unha persoa física non individual (comunidade de bens, sociedade civil, etc)».

7. Na páxina 648, no modelo de impreso DC do anexo 1, o texto do número 4 do epígrafe A queda redactado como segue: «Documento de outorgamento de representación no caso de solicitantes con personalidade xurídica ou de autorización de sinatura cando o solicitante, sendo persoa física, non é quen presenta a solicitude».

8. Na páxina 660, no anexo 10, corríxese a admisibilidade do produto 117, castiñeiro, que queda do seguinte xeito:

Código	Descrición	Grupos de cultivo	Admisibilidade R.P.U.
117	Castiñeiro	R60 outras utilizacións	Si

9. Na páxina 661, na relación de zonas de concentración do anexo 12, engádesse unha nova zona coas seguintes referencias:

Código	Provincia	Concello	Código zona	Nome da zona
27	Lugo	010 Castro de Rei	01	Ramil

10. Na páxina 679, no cadro «primas unitarias máximas nas submedidas de benestar animal» o valor unitario para as aves de curral (carne) indicado en euros por UGM no número 1, debe dicir: «53,00».

AXENCIA DE PROTECCIÓN DA LEGALIDADE URBANÍSTICA

Resolución do 21 de marzo de 2011 pola que se ordena a publicación do Convenio de adhesión á Axencia de Protección da Legalidade Urbanística do Concello de Punxín.

O día 18 de marzo de 2011 a Axencia e o Concello de Punxín asinaron o Convenio de adhesión dese concello á Axencia de Protección da Legalidade Urbanística.

De conformidade co establecido no artigo 9º.1 dos estatutos da Axencia aprobados por Decreto 213/2007, do 31 de outubro, dispoño a súa publicación no *Diario Oficial de Galicia*.

Santiago de Compostela, 21 de marzo de 2011.

María Martínez Allegue
Directora da Axencia de Protección da Legalidade Urbanística

Convenio de adhesión á Axencia de Protección da Legalidade Urbanística

En Santiago de Compostela o dezaioito de marzo de dous mil once

Interveñen:

Dunha parte, Alfredo Cruz Gago, alcalde do Concello de Punxín, provincia de Ourense, en representación do concello, de conformidade co disposto no arti-

go 61º da Lei 5/1997, do 22 de xullo, de Administración local de Galicia, e no artigo 21º da Lei 7/1985, do 2 de abril, reguladora das bases do réxime local.

E doutra parte, María Martínez Allegue, directora da Axencia de Protección da Legalidade Urbanística, en representación do ente público, de conformidade co disposto no artigo 18º dos estatutos aprobados polo Decreto 213/2007, do 31 de outubro.

Expoñen:

1º A Lei 9/2002, do 30 de decembro, de ordenación urbanística e protección do medio rural de Galicia, modificada pola Lei 15/2004, do 29 de decembro, no seu artigo 226º, establece que a Axencia de Protección da Legalidade Urbanística é un ente público de natureza consorcial, dotado de personalidade xurídica, patrimonio e orzamento propios e plena autonomía no cumprimento das súas funcións, para o desenvolvemento en común pola Administración autonómica e os municipios que voluntariamente se integren nela das funcións de inspección, restauración da legalidade e sanción en materia de urbanismo e o desempeño de cantas outras competencias lle asignan os seus estatutos.

Así mesmo, establece que son membros da Axencia a Administración autonómica e os municipios que voluntariamente se integren nela. A incorporación dos municipios realizarase a través do correspondente convenio de adhesión, que deberá obter a aprobación previa do Pleno da Corporación e do Consello da Xunta de Galicia e será publicado no *Diario Oficial de Galicia*.

Os estatutos da Axencia de Protección da Legalidade Urbanística foron aprobados por Decreto autonómico 213/2007, do 31 de outubro, e publicados no *Diario Oficial de Galicia* número 222, do 16 de novembro.

2º O Concello de Punxín ten atribuídas competencias en materia de disciplina urbanística, en virtude do disposto no artigo 80º da Lei 5/1997, do 22 de xullo, de Administración local de Galicia, no artigo 25º da Lei 7/1985, do 2 de abril, reguladora das bases do réxime local, e nos artigos 209º e seguintes da Lei 9/2002, do 30 de decembro, de ordenación urbanística e protección do medio rural de Galicia.

A Lei 7/1985, do 2 de abril, reguladora das bases do réxime local, no seu artigo 10º, determina que a Administración local e as demais administracións públicas axustarán as súas relacións recíprocas aos deberes de información mutua, colaboración, coordinación e respecto aos ámbitos competenciais respectivos e que procederá á coordinación das competencias das entidades locais entre si e, especialmente, coas das restantes administracións públicas, cando as actividades ou os servizos locais transcendan o interese propio das correspondentes entidades, incidan ou condicionen relevantemente os das devanditas administracións ou sexan concorrentes ou complementarios dos destas.

O texto refundido das disposicións vixentes en materia de réxime local, aprobado polo Decreto legislativo 781/1986, do 18 de abril, no seu artigo 69º, establece que as competencias compartidas ou concorrentes poderán ser exercidas conxuntamente pola

Administración do Estado ou da Comunidade Autónoma e a Local, mediante a constitución de entes instrumentais de carácter público ou privado.

3º En virtude do establecido nos artigos 222º.2 e 226º da Lei 9/2002, do 30 de decembro, de ordenación urbanística e protección do medio rural de Galicia, a Axencia exercerá as competencias que lle sexan delegadas polos concellos consorciados.

Neste sentido, o artigo 9º dos estatutos da Axencia, aprobados por Decreto autonómico 213/2007, do 31 de outubro, dispón que a adhesión necesariamente producirá a atribución á Axencia das competencias de inspección, supervisión, sanción e restablecemento da legalidade urbanística que correspondan ao municipio integrado voluntariamente na Axencia, nos supostos que determinan os artigos 209º, 210º e 211º da Lei 9/2002, de ordenación urbanística e protección do medio rural de Galicia, segundo se estableza no convenio de adhesión.

4º Este convenio de adhesión obtivo a aprobación previa do Pleno da Corporación municipal de Punxín en sesión que tivo lugar o 27 de xullo de 2010, co voto favorable da maioría absoluta do número legal de membros da Corporación, de conformidade co disposto no 226º.2 da Lei 9/2002, de ordenación urbanística e protección do medio rural de Galicia, e no artigo 215º.3 da Lei 5/1997, do 22 de xullo, de Administración local de Galicia.

Así mesmo, obtivo a aprobación do Consello da Xunta de Galicia, na súa reunión de data 3 de marzo de 2011, de conformidade co disposto no artigo 226º.2 da Lei 9/2002, de ordenación urbanística e protección do medio rural de Galicia.

Os intervenientes recoñecen mutua capacidade para o outorgamento deste convenio de adhesión, de conformidade coas seguintes

Estipulacións:

Primeira.-*Incorporación á Axencia.*

O Concello de Punxín, provincia de Ourense, incorpórase e adhírese como membro da Axencia de Protección da Legalidade Urbanística, asumindo os dereitos e obrigas que disto derivan, de conformidade co estipulado neste convenio de adhesión e o establecido nos estatutos da Axencia, aprobados por Decreto autonómico 213/2007, do 31 de outubro, e na Lei 9/2002, do 30 de decembro, de ordenación urbanística e protección do medio rural de Galicia.

Segunda.-*Delegación de competencias.*

1. O Concello de Punxín delega na Axencia de Protección da Legalidade Urbanística o exercicio das competencias municipais de inspección, supervisión, sanción e restablecemento da legalidade urbanística establecidas nos artigos 209º, 210º, 211º e 222º da Lei 9/2002, do 30 de decembro, de ordenación urbanística e protección do medio rural de Galicia, en relación coas obras e usos do solo que se executen sen licenza urbanística ou sen axustarse ás súas condicións, sempre que estean situadas nalgunha das seguintes clases de solo:

a) Solo rústico ou non urbanizable en calquera das súas categorías (artigos 15º e 32º e disposición transitoria primeira, número 1.f), da Lei 9/2002).

b) Solo urbanizable ou apto para urbanizar, mentres non sexa aprobado o correspondente planeamento de desenvolvemento (artigo 14º e disposición transitoria primeira, número 1.d), da Lei 9/2002).

c) E núcleos rurais delimitados no planeamento urbanístico municipal (artigo 13º e disposición transitoria primeira, número 1.e), da Lei 9/2002).

A Axencia exercerá efectivamente estas competencias desde o día seguinte ao da publicación do convenio no *Diario Oficial de Galicia*.

2. Nesta delegación de competencias non está incluída a reposición da legalidade nin a potestade sancionadora en relación coas obras completamente rematadas antes da publicación deste convenio, que serán exercidas polo concello.

3. A resolución dos recursos administrativos interpostos contra os actos ditados pola Axencia en exercicio de competencias delegadas corresponderalle ao concello.

Para resolver o recurso deberá solicitarse informe da Axencia de Protección da Legalidade Urbanística. Cando se reciba o escrito de interposición de recurso na Axencia, esta deberá remitirlo ao concello co seu informe e unha copia completa e ordenada do expediente administrativo.

4. A delegación de competencias poderá ser revogada en calquera momento polo Pleno da Corporación, coa maioría exixida no artigo 215º.3 da Lei 5/1997, do 22 de xullo, de Administración local de Galicia. A revogación será efectiva unha vez comunicada á dirección da Axencia e publicada no *Diario Oficial de Galicia*.

Terceira.-Contribución ao sostemento da Axencia.

1. O Concello de Punxín contribuirá ao sostemento da Axencia de Protección da Legalidade Urbanística coas seguintes achegas económicas.

a) O 50% do produto das multas coercitivas impostas pola Axencia para a execución das ordes de reposición da legalidade ditadas no exercicio das competencias delegadas polo concello;

b) E o 50% do importe das sancións impostas pola Axencia aos responsables de infraccións urbanísticas, en exercicio das competencias delegadas polo concello.

2. O importe das multas coercitivas e das sancións impostas pola Axencia en exercicio de competencias delegadas polo concello serán ingresadas polos suxeitos obrigados directamente na conta xeral da Axencia. No suposto de que non sexan aboadas en período voluntario, a Axencia solicitará da Consellería de Facenda o seu cobramento pola vía de constrinximento.

Ao finalizar cada exercicio anual, a Axencia transferirá ao Concello de Punxín unha cantidade equivalente ao 50% dos ingresos percibidos polas sancións impostas en exercicio das competencias delegadas.

Cuarta.-Obrigacións asumidas polo concello.

O Concello de Punxín asume as seguintes obrigas:

a) Prestar a cooperación e asistencia activa que a Axencia lle solicite para o eficaz exercicio das súas competencias;

b) Facilitar ao persoal da Axencia o acceso inmediato aos expedientes de planeamento, xestión e disciplina urbanística, así como canta información, documentación e axuda material precise para o adecuado cumprimento das súas funcións;

c) Prestar o auxilio da policía local para facilitar as inspeccións, executar as ordes de precinto de obras e identificar os responsables de posibles infraccións;

d) Absterse de outorgar licenzas urbanísticas que impliquen a legalización de obras e usos do solo respecto dos que a Axencia ordenase a súa demolición, cesamento ou restauración da realidade física alterada;

e) Solicitar informe da Axencia previamente á resolución dos recursos administrativos interpostos contra os actos ditados en exercicio das competencias delegadas polo concello;

f) Contribuír ao sostemento económico da Axencia nos termos establecidos neste convenio de adhesión;

g) E respectar as estipulacións deste convenio e o establecido nos estatutos da Axencia de Protección da Legalidade Urbanística aprobados por Decreto autonómico 213/2007, do 31 de outubro.

Quinta.-Programa de incorporación.

A incorporación do concello á Axencia será efectiva desde o día seguinte ao de publicación deste convenio no *Diario Oficial de Galicia*.

Os expedientes relativos ás obras en execución nas materias que son obxecto de delegación deberán ser remitidos á Axencia de Protección da Legalidade Urbanística no prazo dun mes desde a data de entrada en vigor deste convenio.

Sexta.-Prazo de vixencia do convenio.

Este convenio entrará en vigor o día seguinte ao da súa publicación no *Diario Oficial de Galicia* e o seu prazo de vixencia será indefinido.

A resolución deste convenio producirase no suposto de que o Concello de Punxín perda a condición de membro da Axencia por calquera das causas que se establecen no artigo 12º dos estatutos da Axencia e cos efectos que o mesmo artigo dispón.

Sétima.-Interpretación do convenio.

As controversias que puidesen xurdir na interpretación deste convenio e a súa aplicación serán resoltas polo Consello Executivo da Axencia, de conformidade co disposto no artigo 10º dos estatutos da Axencia aprobados por Decreto 213/2007, do 31 de outubro.

E, para que así conste, asinan este convenio de adhesión, por duplicado exemplar, no lugar e data arriba indicados.